



101

**EL - KARI'A / SMAK SVIJETA
OBJAVLJENA U MEKI, IMA 11 AJETA**

بِسْمِ اللَّهِ الرَّحْمَنِ الرَّحِيمِ
 الْقَارِعَةُ ① مَا الْقَارِعَةُ ② وَمَا أَذْرَكَ مَا الْقَارِعَةُ ③ يَوْمَ
 يَكُونُ النَّاسُ كَالْفَرَاشِ الْمَبْتُوثِ ④ وَتَكُونُ الْجِبَالُ
 كَالْعِهْنِ الْمَنْفُوشِ ⑤ فَأَمَّا مَنْ ثَقُلَتْ مَوَازِينُهُ ⑥ فَهُوَ فِي
 عِشَّةٍ رَّاغِيَةٍ ⑦ وَأَمَّا مَنْ خَفَّتْ مَوَازِينُهُ ⑧ فَأُمَّهُ رُجُوبٌ ⑨
 وَمَا أَذْرَكَ مَا هِيَ ⑩ نَارُ حَامِيَةٍ ⑪

"U ime Allaha, Svemilosnog, Milostivog!"
**"Smak svijeta."/1/ "Šta je Smak svijeta?"/2/ "i
 šta ti znaš o Smaku svijeta?"/3/ "Toga dana
 će ljudi biti kao leptiri raštrkani",/4/ "a
 planine kao šarena vuna iščupana."/5/ "Onaj
 u koga njegova dobra djela budu teška"/6/ "u
 ugodnu životu će živjeti", /7/ "a onaj u koga
 njegova dobra djela budu lahka", /8/
 "boravište će mu bezdan biti."/9/ "A znaš li ti
 šta će to biti?"/10/ "Vatra užarena!"/11/**

El-Kari'atu jedno je od imena Sudnjeg dana, kao što su i: El-Hakkatu, Et-Tammetu, Es-Sahhatu, El-Gašijetu it.d. Pridajući veliki značaj ovom događaju, Uzvišeni dalje kaže: **"Šta je Smak svijeta? I šta ti znaš o Smaku svijeta?"**, a zatim to objašnjava sljedećim riječima:

"Toga dana će ljudi biti kao leptiri raštrkani", tj. u svom bunilu i raštrkanosti neće znati kuda će udariti, kao što Uzvišeni na drugom mjestu kaže: **"...kao da su skakavci rasuti"**

"...a planine kao šarena vuna iščupana", tj. kao šarena vuna koja se počela kidati. Uzvišeni, zatim govori do kakve će sve počasti ili poniženja, ljude njihova djela dovesti, pa kaže:

"Onaj u koga njegova dobra djela budu teška", tj. kod koga njegova dobra djela pretegnu loša **"...u ugodnom životu će živjeti"**, tj. u Džennetu.

"...a onaj u koga njegova dobra djela budu lahka", tj. kod koga loša djela pretegnu dobra, **"...boravište će mu bezdan biti"**, tj. naglavačke će se strmoglaviti u Džehennem. Neki kažu da to znači da će mu poput majke kojoj se vraća na Onom svijetu biti provalija, i da je to jedno od imena džehenumske Vatre. Ibn-Džerir kaže da je za provaliju

rečeno "majka", jer onaj ko se u nju surva, drugog boravišta, do nje, neće imati. Zato Uzvišeni, objašnjavajući šta je provalija, kaže:

"A šta ti znaš šta će to biti? - Vatra užarena!", tj. užarena, rasplamsala vatra, nepodnosive vrućine. Ebu-Mus'ab od Ebu-Hurejrea navodi da je Vjerovjesnik, s.a.v.s., rekao: (685) "Žestina vatre koju ljudi na ovom svijetu potpaljuju samo je sedamdeseti dio džehenumske vatre." Ovaj hadis navode i Buharija i Muslim. U jednoj od verzija ovog hadisa stoji: (686)"Ona je od nje jača šezdeset devet puta." U Buharijinom Sahihu i Muslimovom Sahihu navodi se da je Allahov Poslanik, s.a.v.s., rekao: (687) "Vatra se požalila i rekla: 'Gospodaru, sama sebe jedem', pa joj je dozvolio da dvaput uzdiše; jednom zimi i jednom ljeti. Najveća hladnoća koju osjećate zimi je od nje, a najveća vrućina koju osjećate ljeti je od nje."

**Ovim se,
zahvaljujući Allahu i uz Njegovu
pomoć,
završava kratki komentar
poglavlja "Smak svijeta".**

* Objavljena nakon sure "Kurejšije".

